

Convenio de colaboración entre a Consellería de Educación, Ciencia, Universidades e Formación Profesional, e a Federación galega de Espeleoloxía para a implantación dun sistema de ensinanzas deportivas de réxime especial con carácter dual polo réxime de bolsas e de contrato para a formación en alternancia.

Santiago de Compostela, 25 de xuño de 2024

REUNIDOS

Dunha parte, D. Román Rodríguez González, conselleiro de Educación, Ciencia, Universidades e Formación Profesional, que actúa en virtude das facultades atribuídas no artigo 34 da Lei 1/1983, do 22 de febreiro, reguladora da Xunta de Galicia e da súa presidencia, modificada pola Lei 12/2007, do 27 de xullo, de acordo co seu nomeamento polo Decreto 60/2022, do 15 de maio (DOG núm. 94, do luns 16 de maio), e no uso das atribucións que lle confire o DECRETO 49/2024, do 22 de abril, polo que se fixa a estrutura orgánica das consellerías da Xunta de Galicia (DOG núm. 81, do mércores 24 de abril).

E doutra, don Gonzalo Villarnea Carreiras, Presidente da Federación galega de Espeleoloxía, como representante legal desta, en virtude das atribucións establecidas no artigo 17 dos estatutos da Federación galega de Espeleoloxía, de 15 de decembro de 2018, modificados polo ANUNCIO de modificación dos estatutos (DOG Núm. 55, do mércores 20 de marzo de 2019).

Interveñen en función dos seus respectivos cargos e, no exercicio das facultades que para convir, en nome das entidades que representa teñen conferidas,

EXPOÑEN

1º. Que a Lei Orgánica 2/2006, do 3 de maio, de Educación, determina no artigo 63.1 que as ensinanzas deportivas están destinadas a preparar o alumnado para a actividade profesional en relación cunha modalidade ou especialidade deportiva, así como facilitar a súa adaptación á evolución do mundo laboral e deportivo e á cidadanía activa.

2º. Que a formación dual do sistema educativo español é o conxunto de accións e iniciativas formativas que, en corresponsabilidade coas empresas, teñen por obxecto a

cualificación profesional das persoas, harmonizando os procesos de ensino e aprendizaxe entre os centros educativos e os centros de traballo.

3º. Que a colaboración das empresas se desenvolverá, entre outros ámbitos, mediante a súa participación na formación do alumnado nos centros de traballo, favorecendo a realización de prácticas profesionais dos alumnos e das alumnas nas empresas e noutras entidades, e deberán establecerse os mecanismos axeitados para que a formación que reciba financiamento público poida ofrecerse por centros ou directamente polas empresas, mediante concertos, convenios, subvencións ou outros procedementos.

4º. Que a Federación galega de Espeleoloxía está disposta a participar no proxecto de implantación, con carácter dual experimental en Galicia, das ensinanzas deportivas de réxime especial de espeleoloxía. Esta especialidade está regulada polo Real decreto 64/2010, do 29 de xaneiro, polo que se establece o título de técnico deportivo en espeleoloxía e se establecen as súas ensinanzas mínimas e os requisitos de acceso.

O alumnado participante que sexa beneficiario de bolsas, non terá en ningún caso vinculación laboral coa empresa e non poderá establecerse entre esta e aquel ningunha relación contractual, nin sequera baixo as modalidades de contrato en prácticas ou para a formación e a aprendizaxe, previsto no artigo 11 do Real decreto lexislativo 2/2015, do 23 de outubro, polo que se aproba o texto refundido da Lei do estatuto dos traballadores, polo que o alumnado acollido a este réxime de bolsas queda absolutamente excluído da lexislación laboral.

5º. Que o obxecto do presente convenio é establecer as condicións de colaboración entre a Consellería de Educación, Ciencia, Universidades e Formación Profesional e a Federación galega de Espeleoloxía para a implantación dun proxecto experimental con carácter dual en Galicia, da especialidade de espeleoloxía, que combinará os procesos de ensino e aprendizaxe nas instalacións das empresas e no IES Plurilingüe San Rosendo, de Mondoñedo.

En consecuencia, as partes acordan subscribir este convenio, con base nas seguintes,

CLAÚSULAS

Primeira. O proxecto de carácter dual deste convenio, que é de carácter experimental, ten as seguintes características:

- a. Este proxecto toma como referencia o plan de estudos establecido no Real decreto 64/2010, do 29 de xaneiro, polo que se establece o título de técnico

deportivo en espeleoloxía e se establecen as súas ensinanzas mínimas e os requisitos de acceso.

b. Terá como duración desde o 1 de setembro de 2024 ata o 31 de agosto de 2028.

c. A formación impartirase de xeito compartido entre o centro educativo e empresas da Federación galega de Espeleoloxía asinante, garantindo a adquisición das competencias establecidos no plan de estudos correspondente e a obtención do título de técnico deportivo en espeleoloxía.

Segunda. As concrecións deste proxecto experimental nesta especialidade impartirase con carácter dual e suporá a formación compartida centro-empresa. A distribución da formación curricular e temporalización dos módulos están recollidas no anexo deste convenio.

Terceira. A Federación galega de Espeleoloxía asinante comprométese a que as súas empresas asociadas acollerán nas súas instalacións un mínimo de 12 alumnos e alumnas, para este proxecto experimental de ensinanzas deportivas con carácter dual. Este alumnado deberá cumprir os requisitos de admisión establecidos pola Consellería de Educación, Ciencia, Universidades e Formación Profesional.

A Federación asinante colaborará coa Consellería de Educación, Ciencia, Universidades e Formación Profesional na selección do alumnado solicitante que cumpra os requisitos de admisión. Para tal fin, poderán realizarse entrevistas psicoprofesionais que permitan identificar a idoneidade dos/das candidatos/as en relación co perfil profesional que adquirirá o alumnado na empresa ao longo do proxecto. A Federación comunicará ao alumnado os criterios e os procedementos utilizados na selección con anterioridade á súa realización.

Estas actuacións serán realizadas por persoas designadas pola Federación xunto cunha persoa representante do centro educativo, de xeito que a selección garanta cubrir o número mínimo de prazas que a Federación se compromete a acoller nas empresas que ten asociadas.

Cuarta. A Federación asinante comprométese a que cada empresa financie o proxecto de formación regulado neste convenio, mediante o establecemento dun sistema de bolsas ou de contrato para a formación en alternancia dirixido ao alumnado participante.

Estes réximes estarán suxeito ás seguintes especificidades:

a. A empresa asinante achegará a cada alumno ou alumna, en períodos mensuais con carácter irrevogable, unha bolsa por importe mínimo da metade da contía do



SMI vixente no ano correspondente para a formación en alternancia, durante os meses nos que a actividade formativa e profesionalizadora se realice integramente na empresa. Tomando como referencia este importe, o resto dos meses o importe calcularase de xeito proporcional ao tempo que o alumno ou alumna dedique á actividade profesionalizadora na empresa.

b. A empresa asinante poderá transformar a bolsa en contrato para a formación en alternancia, regulado no Real decreto lei 32/2021, do 28 de decembro.

c. A localización xeográfica destas instalacións e o lugar de realización da formación na empresa comunicaránselle a cada alumno ou alumna durante o curso.

d. Os alumnos e as alumnas participantes no proxecto de formación obxecto deste convenio serán incorporados ao réxime xeral da Seguridade Social, nos termos e nas condicións establecidos no Real decreto 1493/2011, de 24 de outubro. A conseguinte afiliación e/ou alta, así como a baixa no devandito réxime, produciranse a partir da data de inicio e na de cesamento do programa de formación, nos termos, nos prazos e cos efectos establecidos no regulamento xeral sobre inscrición de empresas e afiliación, altas, baixas e variacións de datos de traballadores na Seguridade Social, aprobado polo Real decreto 84/1996, do 26 de xaneiro.

e. Para a efectividade do réxime de bolsas, a empresa colaboradora e as persoas bolseiras deberán cumprir sempre os requisitos establecidos na normativa que regula os proxectos de formación profesional dual e neste convenio.

Quinta. Con posterioridade á sinatura deste convenio, a Federación adquire o compromiso de que os colexiados asinen unha addenda ao presente convenio, no que figuren cada empresa en relación con cada alumno seleccionado, atendendo ao perfil profesional de cada alumno/a e ás características da empresa.

Sexta. O alumnado adquirirá formación no IES Plurilingüe San Rosendo segundo a temporalización recollida no anexo deste convenio e no horario lectivo que se estableza.

Sétima. A estadía do alumnado na empresa axustarase á temporalización recollida no anexo deste convenio. Durante o período formativo na empresa, o horario da actividade formativa e profesionalizadora deberá desenvolverse dentro do marco temporal do horario laboral da empresa, reservándose unha mañá ou unha tarde cada quincena para a recepción do alumnado no centro educativo por parte do titor ou da titora, na que se realizarán actividades de seguimento, asesoramento e apoio.

Oitava. O alumnado deste proxecto disporá dun mínimo de trinta días naturais de vacacións por curso. Para estes efectos computaranse, por unha parte, as vacacións escolares, establecidas para cada curso no correspondente calendario escolar, das que o alumnado se beneficie durante a súa estadía no centro educativo, e, por outra parte, os días restantes ata completar cando menos o mínimo establecido, que determinará a empresa no período de estadía do alumnado na empresa.

Novena. A actividade formativa na empresa e no centro educativo coordinarase mediante reunións mensuais de control nas que se fará seguimento do alumnado.

A empresa asinante nomeará unha persoa como titor ou titora do alumno ou da alumna, que será responsable do seguimento da actividade formativa, da coordinación da actividade profesionalizadora coa actividade formativa e da comunicación co centro de formación.

Así mesmo, o centro educativo designará un profesor ou unha profesora, como titor ou titora responsables da programación e do seguimento da formación, así como da coordinación da avaliación co profesorado e/ou os titores e as titoras que interveñen. Así mesmo, esta persoa será a interlocutora coa empresa para o desenvolvemento do proxecto.

Décima. Establecerase unha comisión de seguimento, control e supervisión, que se reunirá cando o considere oportuno calquera das partes asinantes. Esta comisión estará constituída polos seguintes membros:

En representación da Consellería de Educación, Ciencia, Universidades e Formación Profesional:

- A persoa titular da Subdirección Xeral de Aprendizaxe Permanente, Ensinanzas Artísticas, Idiomas e Deportivas ou persoa en quen delegue.
- A persoa titular da dirección do IES Plurilingüe San Rosendo.
- O profesor titor ou a profesora titora do centro educativo.
- Unha persoa representante da Federación.
- Un funcionario ou unha funcionaria da Consellería de Educación, Ciencia, Universidades e Formación Profesional actuará como secretario ou secretaria.

Décimo primeira. O convenio entrará en vigor na data da súa sinatura e terá vixencia ata a finalización do proxecto, podendo ser prorrogado mediante acordo das partes asinantes.

Décimo segunda. Este convenio extinguirase pola finalización do tempo convido e poderase resolver por calquera das partes, mediante denuncia dalgunha delas, que se lle deberá comunicar á/s outra/s cunha antelación mínima de quince días, baseada nalgunha das seguintes causas:

- a. Cesamento das actividades do centro docente ou da entidade asinante.
- b. Forza maior que imposibilite o desenvolvemento das actividades programadas.
- c. Incumprimento das cláusulas establecidas neste convenio.
- d. Mutuo acordo entre as partes asinantes.
- e. Transcurso do prazo de vixencia sen acordarse a súa prórroga.
- f. Por decisión xudicial que declare a nulidade do convenio.

Décimo terceira. A sinatura deste convenio suporá o consentimento expreso da persoa interesada á Administración para incluír e facer públicos os datos referidos ao convenio, de conformidade co artigo 15 da Lei 1/2016, do 18 de xaneiro, de transparencia e bo goberno, co artigo 8 da Lei 19/2013, do 9 de decembro, de transparencia, acceso á información pública e bo goberno, e co Decreto 126/2006, do 20 de xullo, polo que se regula o Rexistro de Convenios da Xunta de Galicia.

Décimo cuarta. Este convenio de colaboración posúe carácter administrativo por razón do contido e das materias sobre as que versa, as cales, ao abeiro do disposto no artigo 6 da Lei 9/2017, do 8 de novembro, de contratos do sector público, o exclúen do seu ámbito de aplicación, sen prexuízo da aplicación dos principios desta lei para resolver as lagoas ou dúbidas que a súa aplicación suscite, tal e como indica o seu artigo 4.

Décimo quinta. Ambas as partes comprométense a cumprir as obrigas que se derivan da normativa en protección de datos que se desprende da Lei orgánica 3/2018, do 5 de decembro, de protección de datos persoais e garantía dos dereitos dixitais, ditada para adaptar a lexislación española ao Regulamento (UE) 2016/679 do Parlamento Europeo e do Consello do 27 de abril de 2016 relativo á protección das persoas físicas no que respecta ao tratamento de datos persoais e á libre circulación destes datos, e polo que se derroga a Directiva 95/46/CE (Regulamento xeral de protección de datos). Os datos persoais das persoas físicas asinantes do convenio serán tratados polas partes asinantes unicamente para a formalización e o desenvolvemento adecuados deste, e con base no disposto no artigo 6.1 b) do RXPD.

Décimo sexta. Segundo o artigo 14.2 da Lei 39/2015, do 1 de outubro, do procedemento administrativo común das administracións públicas, os colectivos que están obrigados a relacionarse a través de medios electrónicos coas administracións públicas e, polo tanto, a recibir notificacións por canles electrónicas son: as persoas xurídicas, as entidades sen personalidade xurídica, os colexios profesionais, os que representen un interesado que estea obrigado a relacionarse electronicamente coa Administración, e os empregados das administracións públicas para os trámites que realicen con elas por razón da súa condición de empregado público.

As notificacións realizaranse só por medios electrónicos a través do Sistema de notificación electrónica de Galicia Notifica.gal, (<https://notifica.xunta.gal>). Para poder acceder a unha notificación electrónica, a persoa interesada deberá contar cun certificado electrónico asociado ao NIF que figure como destinatario da notificación (persoa física ou xurídica).

Así mesmo, a persoa interesada pode autorizar a calquera outra persoa a acceder ao contido das súas notificacións.

Lido este convenio, atópano conforme e asínano.

O conselleiro de Educación, Ciencia,
Universidades e Formación Profesional

Presidente da Federación galega de
Espeleoloxía

Asdo.: Román Rodríguez González

Asdo.: Gonzalo Villarmea Carreiras

ANEXO I

1.1 Identificación

Convenio entre a Consellería de Educación, Ciencia, Universidades e Formación Profesional e a Federación Galega de Espeleoloxía para a implantación dun sistema de ensinanzas deportivas de réxime especial de espeleoloxía con carácter dual polo réxime de bolsas ou de contrato para a formación en alternancia.

1.2 Distribución de postos de formación

Empresa	Ciclo	N.º de prazas
Federación galega de Espeleoloxía	Ciclo Inicial	12

1.3 Distribución do plan de estudos das ensinanzas deportivas de Espeleoloxía.

Duración do proxecto		Ciclo inicial
Estancia	Centro educativo	12 semanas
	Empresa	4 semanas
Total		16 semanas

1.4 Organización dos módulos

I. CICLO INICIAL DE GRADO MEDIO EN ESPELEOLOXÍA

RAE-EPEP101: Proba específica de acceso ás ensinanzas do ciclo inicial de grao medio: 120 h

Módulos do Bloque común	Horas no centro	Horas na empresa
MED-C101: Bases do comportamento deportivo	20	0
MED-C102: Primeiros auxilios	30	0
MED-C103: Actividade física adaptada e discapacidade	5	0
MED-C104: Organización deportiva	5	0
TOTAL	60	0

Módulos do Bloque específico	Horas no centro	Horas na empresa
MED-EPEP102: Conducción por itinerarios de iniciación en espeleoloxía	25	5
MED-EPEP103: Materiais en instalacións en espeleoloxía	25	5
MED-EPEP104: Metodoloxía da ensinanza da espeleoloxía	40	5
MED-EPEP105: Organización de actividades e eventos	10	5
MED-EPEP106: Formación práctica	0	150
TOTAL	100	170

Secuenciación

O MED-C101: Bases do comportamento deportivo impartirase antes que o MED-C103 Actividade física adaptada e discapacidade.

O MED-EPEP104: Metodoloxía da ensinanza da espeleoloxía e MED-EPEP103: Materiais e instalacións de espeleoloxía, impartiranse antes do MED-EPEP102: Conducción por itinerarios de iniciación en espeleoloxía.

O MED-EPEP103: Materiais e instalacións de espeleoloxía impartirase antes que o MED-EPEP105: Organización de actividades e eventos.

TOTAL HORAS DO CICLO INICIAL: 450

1.4.1 Implantación

A implantación das ensinanzas realizarase no curso académico 2024/25, sen prexuízo da posible continuidade do proxecto.